



喬三石集序

如臯孫應鰲撰



三石子喬公世寧卒友人孫應鰲志其墓矣再
叙其詩文叙曰文章為道總機械于造化妙與
象于性情凡品格程度往獻談析大略亦備矣
要必得所師承則遵塗不詭門戶堂奧可循焉
入而又必用志罔分始精凝神會是北宮無設

于一間之旨梓慶所繇不敢以耗氣加成鍊也
然非博極其趣亦無以究竟指歸精神所凝會
發之易窮傳也必不遠文章之道其難乎 明
興當弘治正德間文治鬱起是時北地空同李
子信陽大復何子為之宗三石子與空同子同
產于秦相距甚邇少即慕效焉稍長為諸生適
大復子來秦為督學使首目三石子必且鳴世

于是立召前立與語無常時口授三石子意義
談必移日自是三石子文思益偉拔邁流俗遂
赫然以詩文雄關中斯師承之正轍也三石子
既仕官主事官中郎官僉事官督學使官叅政官
按察使爵祿皆不入其心官十五年食不重味
身不離布衣補其敝衣一中輒數年不易于嗜
好澹莫顧獨心于詩文是精神所凝會矣三石

子既心于詩文乃積書至萬餘卷鞠明究曠纂
英槲華凡宇宙間廣長數千萬里上下數千萬
年靡不融浹隨意所向而出之較若畫一信博
極其趣哉三石子詩文具在斯集文不作漢以
後語詩不作唐以後語洗剽剝繁陋之習一裁
于造化性情之真傳也必遠以三石子異稟其
成一家言必若此文章之道信其難乎三石子

未沒人人仰服德行比于光岳凡侍坐聽論議
皆得所未有再三歎嗟而去諸交遊與關中新
進舊門下士無不迂道來訪罔虛日泊沒臨哭
數百千人奔吊相屬于道塗其人如此其集之
出其傳之必遠抑又可知士多惜三石子官至
按察使遂自斫其用嗟嗟空同子大復子官止
督學使視按察使又稍亞今二子所傳何似邪

集曰丘隅本三石子所自命詩云縣蠻黃鳥止
於丘隅小丘三石子隱居所也然其命意抑又
澹莫遠矣

喬三石集上卷

後翎喬世寧景叔著

樂府

胡無人

有叛人道虜入寇山陰喬子聞之作此篇

胡無人胡可滅長城烽火何時休山陰城外日流血
沙場白骨高如山千村萬落人烟絕昔不攻城今攻
城誰其教汝中行說中行說爾獨何人自作孽衛律
之罪上通天蘇武萬古稱豪傑 皇家一統四海清

九邊將士熊羆列，剽蕩汝曹風掃雪。汝獨何人自作孽，胡無人胡可滅。

長安道

長安道直以迂環，五城開九衢。外羅天市拱，皇居中懸日月耀金樞。朱輪驄馬如流水，長安道上禁馳驅。誰家少年俠邪徒，雄豪去天尺五餘。白日殺人當路衢，司隸過不問。况乃執金吾，人言輦轂之下朝。犯法暮伏誅，吁嗟此徒天日無。霍家奴衛家奴。

臨高臺

臨高臺下臨深谿，上有樓觀中天開。觀日滄海海水一杯，仙人靈藥在蓬萊。望而不見思悠悠，哉日日臨高臺。仙人來不來。

塞上行

塞南三月花如雪，塞北三月冰猶結。塞冰開時春已歸，塞草青時雪復飛。一年半在水雪裡，黃雲黯慘風日起。風起雲黃沙滿天，戰場白骨高如山。幾時天子滅胡虜，塞下銷兵人種田。

塞下曲四首

中丞旗鼓再臨邊
雲鳥風雷列陣前
惡少曠徒新應募
縣官趣辦犒軍錢

其二

入衛邊兵久未歸
孤城殘壘仗天威
那堪日旰猶空釜
况復霜嚴未授衣

其三

五路盡誇龍虎軍
將軍猛氣鬱如雲
野夫擬著磨厓頌
何處先傳露布文

其四

聖主昨聞邊塞情
夜來應為禱西清
懸知風電清沙漠
瀚海黃河為洗兵

少年行

千金駟馬五花裘
月夜花朝過五侯
聞說左賢新近塞
時將一劍指雲州

折楊柳

俯瞰御溝波
仰攀楊柳樹
柳條百丈長
那綰郎船住

大堤曲

春夜月如水
春江清見底
與儂遊大堤
好趁月明裡

燕歌行

西日不再中東流無迴波人生如夢寐少壯能幾何
朝馳長安道暮送歸山阿胡不置酒高堂鼓瑟日以
歌君王萬歲罷干戈霍家衛家相經過千金駿馬換
吳娥今者不樂來日無多黃金白髮柰君何

出塞行

黎陽王太傳出塞逐虜威震朔漠中今邊防
安得此人也余心壯之作出塞行
君不見黎陽王太傳文武才名稱獨步憶昔 孝皇

親授鉞龍沙鴈塞被霜露威寧海子擣胡巢軍聲殺
氣雷霆怒一舉能令瀚海清 九重無復陰山顧邊
塞真看萬里城 君臣可是千年遇戰士能傳奏凱
歌詞人為著北征賦一自轅門殞大星遂令胡馬輕
南駐安得太傅今復生邊陲更倚長城固吁嗟乎丈
夫生當萬里封胡不一劍橫行匈奴中眼前富貴真
何有高堂醉飽空白首一朝病死名亦朽

嗟哉行寄長寧令羅少玉

君不見馮唐白首尚為郎賈生才子歎浮湘漢庭不

重相如賦梁園賦客傾鄒陽古來豪俊不得意鷹隼
橫飛鸞鶴避以子高才際盛時萬馬群中馳一驥謂
當即上黃金臺胡為執繫遐荒地三年奔走空山谷
殊方終日羣魑魅如此尚遭官長嗔臺章不薦循良
吏嗟哉世事多翻覆蛇短龜長魚走陸蘭蓀蕭艾等
榮枯以梟為鳳石為玉誰人捕鹿誰食肉誰人采桑
誰服穀誰人種樹誰華屋嗟哉世事多翻覆巴人誰
和陽春曲念子情如鴻漸木人生際遇真難料公孫
遲暮終軍少有時蘿蒿俯長松有時腐草生光耀君
年卓魯徒白日行天江水流

五言古詩

送王孟莘之大梁

遠遊來舊京與子同謹讌女蘿附松栢纏綿引枝蔓
枝蔓何修修託此凌霄幹豈無樟與楠松栢常不變
永懷貞素質謂可諧夙願飄飄行天雲隨風忽分散
子有大梁役予亦趨蜀漢清晨相娛樂日夕各鄉縣

言念平生謹悽悽生寤歎

行經渭川

烈風夜不休霜晨萎百草百草安足惜時序令人老
客行淒以寒還家胡不早迢迢東逝川上有長安道
馳逐聲利間終日徒擾擾去日既以多來日益以少
誰能百年內顏色長美好歸去故山岑沉冥以自保

雜詩四首

郊原曠以修蔓草何萋萋豈緣雨露私延蔓彌庭臯
庭臯日扃寂何以託蘅茅亦有蘭與蕙化為艾與蕭

翦鋤良不易我心徒煩勞煩勞竟何待歲暮霜霰交

其二

屹屹南山松託根凌絕坂高枝迥扶疎卑枝低偃蹇
霜幹何蚪曲歲久長苔蘚苔蘚鬱纏綿上有藤蘿滿
長風響空寥靈籟聞何遠山坂莽岑寂四顧人跡罕
幸辭斧斤殃敢望梁材選流膏結茯苓淒其芳歲晚

其三

冉冉西飛日悠悠東逝川頽陽豈再晨逝水無迴瀾
天地等逆旅須臾桑海遷王侯與螻蟻同盡歸蒿田

老氏貴知希安用矜豪賢三五迭禪繼世代邈以綿
靈文啓六符龜馬洩真元流行逮墳丘詩書日蔓延
神明歷萬古逝如薪火傳音響如有聞彷彿覲形顏
乃知羨門子遺術空誕謾

其四

伊昔遘嘉會四海結交親羣遊展謹讌意氣凌高雲
寧知轉眄間棄如陌路塵蘭草豈不芳當門則共瞋
琴瑟且殊調竹柏亦異心世塗况嶮巖能無商與參
馳驅聲利場憂端日以新驅車駕言邁言返北山岑

顧謝平生懽我心難具陳

棄婦詞二首

與君初結髮恩愛一何深兩意共綢繆宛如瑟與琴
謂可極歡娛百年託此身不謂妾薄命使君多異心
昔也同衾裯今為行路人形影不相顧况近君牀裯
君如天上雲妾如陌上塵情好既乖別安用辨浮沉
當歌歎絕絃念彼白頭吟

其二

天地無終期夫婦常不離新人一入門故人相見稀

憐新輕棄故問君何以為容華有銷歇恩愛能不移
僂俛更結束君心終見疑中夜起徬徨淚下霑裳衣
長跪謝夫君去去從此辭願為明月光夜夜入君帷
此意竟纏綿妾心君豈知君其愛景光慰我長相思

隴頭吟

蕩子遠從軍西擊羌與氐不愁戰城南愁經隴水西
隴水魚不遊隴樹鳥不棲冰雪日載塗六月寒以淒
停車懷故鄉行人立慘悽慘悽摧心肝北風聞鼓鼙
我車不可停軍書難久稽丈夫志封侯安得常首丘

去去莫復歎努力為國讐

雲臺觀望嶽

晨起升雲臺言念三峰上三峰不可登樓觀遙相望
伊昔買山翁千載稱高尚我欲往從遊神情寄超曠
秋風吹我裳我懷悽以愴日晏息山阿一顧一惆悵

感述

海中有三丘日月相虧蔽閃爍金銀闕冉冉流雲氣
樓觀上通天群僊日遊戲我欲往從之東望浩無際
松子與王喬千載亦長逝伊昔望僊臺煌煌羅羽衛

延佇意超忽神人不可致諦觀玄化流四序迭相繼
三光時凋落泰山忽如礪天地有終極安論人間世
委順與天遊于道乃符契

贈馮生

鴻鴈翔江海栖栖杜與衡年年出塞飛毛羽多凋零
豈不愛毛羽棲志本青冥丈夫遊四海飄然如風雲
清旦相娛語日夕起遐征念此殊不樂惻惻傷我情
綢繆夙所戀其如身與名悠悠川上波汎汎水中萍
誰不念離別離別古所輕辛苦勿復道風霜行自保

種瓜吟

喬子見人有父子兄弟相殘者大感傷焉而

作是詩

種瓜滿平疇日有瓜飀願膏雨既已渥決渠復臨灌
顧茲徑寸苗紆曲引長蔓結實碩且繁離離五色爛
中心竟何遠恩愛從中變摘瓜不顧情況乃傷瓜蔓
宿昔同根芟枝葉忽分散嗟嗟行路人日月能相見
言念豆箕吟日夕獨悲歎

七言古詩

芳歲闌送艾治伯還京

芳歲闌海水天風日以寒繁霜淒斷吳洲草此日風
雪行路難行路難獨延竚陰靄浮雲蔽海嶽萬里長
安在何處君從日下眺長安我向江干歌白紵江干
日下並含愁鳳凰鷺不同遊一望旌旂竚江口還
將錦纜繫僊舟繫僊舟折楊柳與君更醉金陵酒君
看一水分南北江南江北空回首

送呂定原按察湖南

秋風動錦川秋水連天際江橋列旆軒棧道躡雲霧

斗邊秦漢城日下長安路此時送君歸故鄉遂持霜
簡下湖湘已見空同生氣色更知江漢有輝光江漢
空同一回首雄名萬古傳不朽里第應開駟馬門法
星先已映南斗我到西州悵遠遊與君謹讌結綢繆
君今夙駕不可留令人日夜增離憂君不見鸚鵡洲
前芳樹多黃鶴樓中僊侶過片月飛來臨漢水蕩搖
天地入烟波勝覽真如圖畫裏風流文采元無此暇
日登臨發興豪揮毫冉冉烟霞起酒罷詩成倘念予
遙天好寄漢陽書

望雲篇

遊子辭家千萬里忍見烏生八九子古來蜀道上青
天况復岷江隔渭水岷江渭水日悠悠客心日夜亦
東流遙憶我翁今白首逍遙宛似蓬萊叟萱草榴花
照度辰歌鐘金鼓開春酒愛弟登堂戲彩衣稱觴獻
果從賓友我今胡為滯西川不隨季子舞前筵峨眉
山上玉為田峨眉山下醴為泉願獻我翁八百歲雲
輶羽蓋遊人世五夜長懸拜斗心十洲還有求丹計
秦關紫氣晝網緼家在終南太華終南不可

採蓮歌

見朝朝暮暮望白雲望白雲獨延佇愁心直向雲飛
處曠野青天萬里清長風莫捲白雲去

紅蓮出水霞爛光白蓮出水風送香露白月明秋夜
長美人翠袖曳羅裳時從花底照新粧朝花朵朵如
蓋張暮花結子摧秋霜朱顏如花易凋傷折花不語
空斷腸且復踟躕水中央莫輕蕩槳過蓮塘只愁驚
起雙鴛鴦

明星篇

明星高一丈海日煌煌上海日映扶桑車馬扣天閭
車關關馬班班夜如何其風露寒蓬門卧者是誰子
日過床頭眠未起

聞雲中警報

單于夜渡桑乾水雲中四望邊烽起將軍一夜營三
徙彼胡何異犬與羊可憐近塞良家子自從胡兒入
漢關關南十家九戰死吁嗟十家九戰死將軍何曾
發一矢縣官抱空印愁歎孤城裡將軍將軍爾何為
不見山陰城外增新壘城外新壘猶可增秭恐城中

長荆杞

攬鏡歌

嗟我年來秭愁病藥裹關心寧攬鏡寶鏡塵昏久不
開爭妍取媚非吾性今辰何辰鏡一看雙鬢短蓬鬚
皓然對此移時慘不語低頭淚下還忘食悲來擲鏡
起自歎百年幾何今過半填海補天空有情金膏玉
樹誰曾見鏡裡容華真逝波眼前富貴驚流電鐘鼎
竹帛各有時萬事無能心力倦却恨少年不努力忽
復老大嗟何及高堤不堰東流水長繩那繫西飛日

呼兒收鏡置箱中莫再開箱惱爾翁

九邊圖歌書四兄屏

山人志在滅匈奴草玄兼且學孫吳孫吳未就老將
至開屏忍見九邊圖九邊圖開歷可指延亘長城一
萬里西近河源東海隅華夷之限誰為此憶昔洪武
始開疆永樂親征出塞荒勢如芟草與驅羊從此幕
南無戰場奏凱歸來傳露布 帝也垂衣無外顧亭
障遙看烽火息山河永奠金湯固將士身閑習射獵
塞垣田墾寬租賦正統末年胡始驕六龍北狩染腥

臊一時文武善經略白日再覩青天高弘治以前成
化後兵馬獨稱全盛朝四十年來事勢變強兵壯馬
今無半三衛陰謀持兩端諸胡部落日滋蔓昨者突
爾窺 皇都遂使流血滿畿甸一月京城閉九門此
事令人空憤歎遼海頻年又喪師大同近復遭危患
已將河套作巢窟能保河西不蹂踐殺氣常令塞日
昏精靈時向蕪城見海內軍需歲月增城南廣野蓬
蒿徧帶甲枕戈誰穩眠裹瘡朽腹猶催戰健兒猛士
死無名相門制府軍功冠皎日轟雷猶在天覆軍殺

將誰曾按只今邊報日無虛開府登壇柰爾徒指圖
按劍坐歎息誓不戴天同此胡况今 天子親推轂
頗牧衛霍世豈無吁嗟乎頗牧衛霍世豈無即看萬
里擣穿廬北臨瀚海洗兵車歸來長組繫單于請君
更作凱旋圖

玄鶴行

聞鑑川王子登空同山見玄鶴余心慕焉為
賦此篇

我聞空同山上有古仙庭中有玄鶴棲洞冥時復乘
風遊太清玄鶴飢食玉田禾渴飲甘露精千歲色始
玄天地同長生我思玄鶴不可見側望空同祗長歎
君上空同問道臺天風忽送玄鶴來舉手招玄鶴劃
然天宇開四海一杯水五嶽等浮埃此時意興超八
極下視人世何有哉自謂平生此竒遇胡不即跨玄
鶴去來往蓬丘渺烟霧日與群仙共嬉娛胡為日暮
空歸來回首玄鶴復何處我亦十年慕廣成白雲常
繫帝鄉情聞此令予意超忽若有烟霞平地生又若
毛羽使身輕宛坐仙臺上逍遙指玉京玄鶴冉冉來

相迎上有羽蓋下雲輶幾時見此玄鶴羽蓋與雲輶
與君同賦昇天行

劍歌送人從軍

我有千金之寶劍魑魅深藏不敢見決雲向天天門
闢斬蛟滄海海水赤學劍曾學萬人敵十年不用挂
高壁風雨常聞龍夜吟山堂白晝驚霹靂自歎平生
成劍癖十都五城猶愛惜昨聞壯士遠從軍今日當
筵持贈君虹光紫氣久沉淪君試拂看星斗文君不
見海南塞北滿風塵天地黯慘結愁雲須君揮寶劍

萬里蕩妖氛北窮朔漠南甌閩古來征戰多苦辛夫
夫逢時早致身更須買馬東市里風馳雷擊從今始

靜明觀歌

觀即唐孫真人思邈隱處

太玄洞南靜明觀五臺相向開宮殿層嶂重山栢樹
合白日陰森上霄漢有時長風萬里來虛空縹緲鸞
笙散山勢逶迤連磬玉氤氳寶氣光芒現仙人曾此
學長生龍虎金丹九轉成芝蓋雲輶朝玉京靜明宮
觀即蓬瀛中有斜屈三古栢地靈歲久色蒼碧呵護
從來信鬼神仙人無乃留真跡樹木壇場人愛惜唐

宋金元俱護敕當日齊名萬壽宮道士承恩賜紫同
祈禱時時遣上公金誥御香來禁中祇今誰煮白石
爛素書漫堆青玉案苔蘚剝殘福壽碑風雨半入玄
元殿輜軒寶馬日來遊絳節金幢能復見往事曾留
歎世吟清真尚想續仙傳仙人羽化已千秋嗟予常
此訪丹丘丹丘渺何處金藥不可求少壯幾時今白
頭日暮歸來歎城郭四望塵海增煩憂君不見空同
古臺天地留軒后赤松不再遊河上仙翁西海去關
門不復度青牛又不見秦人洞黃鶴樓浮雲逝水空

悠悠

歲暮吟二首

玄冬雪霰日交交野雲黯慘冰山高林莽晝昏風怒
號芷蘭委地等黃蒿鶩鷓野立豺虎驕中原鴻鴈聲
嗷嗷我心忉怛增煩勞

其二

冰雪陰悽日烟霧北風怒捲沙蓬去野老出門還四
顧風急沙昏去無路關山曠漭知何處邊書昨夜催
征戍憂來祇著玄思賦

海鶴圖歌為辛震莊壽其婦翁

近代畫鶴誰最古林良呂紀心獨苦此圖定出呂與
林天風蕭颯生毛羽八鶴意態各不同宛如天上八
仙翁逍遙如向崑崙頂又如返顧滄溟東溟海崑山
渺烟霧日月千春等朝暮鰲甸常開芝草花蓬萊盡
是瓊瑤樹君從何處得此圖草堂日日對蓬壺堂上
有翁今白首年年歲歲開春酒開春酒為翁壽悅見
雲笙晝下來群仙接引緱山叟

烏棲吟

西山落日墮城隅草堂烟樹滿棲烏御史府中不共
宿却伴山人棲林谷山人無乃忘機者羣烏何事聯
翩下聯翩下來若為情誰者少年城上行爾寧粘雀
打流鶯莫遣夜烏棲復驚

喬三石集下卷

校桐喬世寧景叔著

五言律

聞王伯啓自淮之金陵

淮南攀桂樹遙繫故園心
更渡長江去相思一水深
客中惟寶劍海內重黃金
莫向吳門月空歌白紵吟

春江曲

江水平如鏡耶溪望轉幽
輕盈游女珮喧動采菱舟
欲蕩青春目還生白紵愁
何如寶家婦織錦上高樓

長干曲

妾住長千里別郎芳杜洲詎知蓬一斷却似水東流
折柳誰堪寄落梅空自愁莫逢蕩女棹留滯越溪頭

騮馬

騮馬繫朱纓煌煌赤電生千金蒙一顧萬里為君行
落日城南戰因風塞下鳴只愁流血盡不罷漢家兵

劉生

意氣五陵豪登壇仗節旄生來雙燕頤况有九龍韜
細柳垂金甲連星璨寶刀君恩如可報軀命等鴻毛

入塞

沙海烽塵息將軍奏凱還九邊傳露布一夜到甘泉
天子開麟閣都人望馬鞭定知金市裡甲第在今年

聞笛

何處吹羌笛龍吟入夜哀乍驚雲外落應向月中來
楊柳春先報關山客未迴更愁三調罷飛盡漢宮梅

關山月

關山一片月楊彩射金微胡馬中宵動天街七暈圍
將軍橫塞角少婦擣邊衣為有刀頭望長看破鏡飛

梅花落

坐待梅花盡
征人獨未歸
宮粧臨鏡懶
春信到邊稀
斷縷驚龍管
餘香入鳳帏
持將花比貌
空有淚沾衣

春鴈

春風纔幾日
江鴈已春聲
關路何時返
鄉愁為爾生
望窮遙漢影
不盡倚樓情
却憶金河北
人同出塞行

江樓

江浦作

獨上望江樓
烟波送客愁
寒雲澹秋浦
落日信漁舟
地盡鼉鼉窟
天平蓼荻洲
滄溟定不遠
何處羽人丘

答李汝承寄書李時在揚州

兩月三書至
美人情更深
烟霞開錦字
江海見離心
俱是遠遊客
况多懷舊吟
無因凌羽翰
一聽廣陵琴

同部僚城南登臺

白雲望不盡
况復臨高臺
春色滿天地
客愁何處來
他鄉逢此日
萬事且啣杯
有酒不同醉
山花空自開

同部僚遊燕子磯

春興燕磯遊
臨江客思流
物華得此日
吾道且滄洲
溟海元相接
長風况未休
片帆如可駕
同此向蓬丘

聞蟬

流螢飛不止高樹忽蟬鳴為爾鄉愁切因之秋思生
風來正歷亂日暮益淒清雙鬢憐蕭颯恐多霜露情
同沈子永福寺訪劉道人道人蓋百餘歲人其
形貌類有知者因留宿寺中慨然有思于神

僊之事

羨爾遊僊客松苓識歲年禽經常自戲鴻寶為誰傳
秋夜憐相遇山房得共眠如聞天籟發于此悟真詮
贈何逸人

少負風雲氣逍遙入暮年一生談海嶽得意即神僊
賣卜名元重啣杯道自全兩都真曠覽贈爾遠遊篇

眉州山亭見鴈

高亭聞鴈過為爾一憑欄關塞何其遠天風日以寒
迴翔秋水曲忽起暮雲端來處長安道令人向北看

行嘉州城

勝地三江匯孤城撼水開山當雲裡見人似鏡中來
雉堞穿林入彪旗映日迴四方須猛士登覽媿雄才

江上游望

江臯雨新霽野曠遠山平飛鳥向空沒片帆何處橫
春臨草色動日暮客愁生鄉路應無極望雲空復情

答和孟衛原雪日寺中送別

我再遊京國憐君獨苦吟過逢詩每就披玩夜常深
白雪聞高調行雲動遠心直愁岐路別何處更知音

十七夜月

中秋不見月今始對晴輝素魄憐初減高樓興已違
關山仍北望烏鵲尚南飛莫更浮雲起餘光正可依
入太和山

仄駕越名嶽遐心屬上清忽看高鳥過欲傍赤霄行
歷歷經仙館迢迢指玉京前峰白雲起應慰帝鄉情

遇真宮

不見仙人屣玄宮憶舊棲白雲深處處瑤草尚萋萋
霞想心空結鸞乘望欲迷儻徇澗水曲落日萬山西
胡隱君歸環溪

聖代方招隱山人獨倦遊滄洲懷故業歸棹及新秋
應對環溪水常為不繫舟倘逢漁父過還問羽人丘

即事

天故驕強虜更番困朔雲關南皆輓餉閭左半從軍
亭障日流血孤危望救焚野人愁欲死 聖主未曾
聞

時事感述

已未虜大入薊州庚申南
京有軍變黃侍郎遇害

白下今年事還如代郡無分明干 帝紀况乃闕
天都邊塞滿戎馬豺狼更爾徒舊遊曾此地垂淚向
江湖

鄭生為余作林下圖因書圖後

多病棲林莽非關慕隱居蒼生猶繫念白髮劇愁予

遂作丘隅叟常看柱下書莫將羅雀巷錯比卧龍廬

秋夜

涼夜空庭立秋聲何處來豈緣一葉下無乃亂砧催
霜露宛相待關山意轉哀詎知月落盡徒倚未能迴

閨思

秋蟲喧四壁明月照流黃言念征人遠其如秋夜長
愁來空擣練河廣恨無梁祗向高樓上時看北鴈翔

山人

山人世故踈中歲已懸車跡已甘迂叟名猶誤薦書

終然浮海性常戀白雲居為謝山公啓嵇生懶未除
古意

秦女曳羅裳雲開見月光容華真絕代夫壻况為郎
宛轉城隅路行歌陌上桑相逢五馬使為爾立彷徨
憶楚中諸生

往歲宣功令遠遊雲夢墟春風將蕙草隨處襲人裾
江上烟波渺秋來夢寐餘逢人時問訊九畹近何如
輓温將軍

曾過將軍里人稱洛下雄殞星憐往日大樹起悲風
關塞方多難泉丘柰此翁邛山野草合懷望意無窮
温襄陽哀詞

高才河洛重名宦楚秦知長路看君往中年得數竒
墓依清澗曲淚墮峴山碑玉樹高庭發應銷泉下悲
聞嚴少師罷

元輔持衡久乾坤信轉移生來逢異數老去戀明時
今日承天語啣恩出鳳池雀羅曾相府世事已前
知

江上留別薛時花

鄉關元共里郎署况同遊別酒憐今日停雲起暮愁
蓼花迷遠浦楓葉亂孤舟誰謂離心隔相思江水流

寄當塗楊丞

江上新丞宰關西舊世家青山映官舍流水足生涯
愛客惟傾酒逢春學種花有時松下坐吟眺亦堪嘉

立秋日都下送子成歸

海內誰知己天涯更送君秋憐今日至客向野橋分
去住皆游子鄉關望白雲離尊正悽愴落葉豈堪聞

采蘭曲

三月城東陌春芳日以微采蘭臨水曲零露濕羅衣
塞上思應苦江南夢已違佳人不可見日暮悵忘歸
七夕過臨潼馮董二舉人招飲溫泉

相逢難此夜游宴過華清何處長生殿當時無限情
山花還繡色宮樹滿秋聲罷酒中庭月蕭然客思生
送田郡博歸漢陽

微官仍罷去江上別愁深棄置今何歎沉冥古所欽
鶴樓聞尚在僊侶好相尋予亦倦遊客因之懷故林

舟中書事

春水今仍發孤舟尚未歸
宦情雙鬢改客思片雲飛
峽樹啼猿合巴江過鴈稀
誰憐飄泊處取次換征衣
春來不見鴈

春事看將罷巴東鴈不過
滄洲空悵望客子意如何
峽斷雲天隔江深風雨多
短書誰為達日夕渺烟波

望月有懷

春城望明月皎皎在東林
忽憶隴山客其如漢水深
仰天憐共遠中夜一長吟
坐待清輝滅空餘攬贈心

秋夕

迴風翻墜葉落月半平林
露坐空堦寂烟霏入夜深
高樓誰弄笛萬戶復鳴砧
愁絕秋聲急况多關塞心

西橋寺送客

古寺江之滸開門見遠山
佳人能遽別幽事復相關
情逐暮雲去興如流水閒
從來臨勝地還可慰離顏
送侯鴻臚自楚歸

到處家無定胡為更遠遊
鄉關雲北望客思水東流
莫問浮湘事翻增吊屈愁
誰憐漢江上日暮一孤舟

聞河西警報

上郡連烽火河隍更羽書一時傳警報中夜獨躊躇
歲苦兵戈擾身憐老病餘名山猶未卜何處可閒居

村居

故業西山下春深過雨時里門常獨往野老若為期
共話桑麻長那知歲月移行藏陶令是祗少去來辭

寄憶嘉州任亭錫副使

世途不可問良晤渺難期江草綠誰發江雲獨爾思
買田應附郭移舍想鄰池况復峨眉近遊山定有詩

苦雨

經月常陰雨愁霖正此時流雲低擁樹積水漫成陂
鄰叟誰相過草堂開更遲南山那不見招隱曠心期

七言律

擣衣

城上秋風木葉稀城中思婦擣寒衣誰憐此夜腸空
斷獨恨經年戍不歸聲度隴雲傳雪嶺心隨關月到
金微相思更有殘機錦願逐長安一鴈飛

花朝

海鄉今日是花辰歌鼓早聞喧四隣不見芳菲來送

酒莫教風雨更愁人
賓僚並集城南寺
軒蓋應多陌上塵
紅杏碧桃誰寄我一枝
聊賞故園春

秦嶺館中

客舍晚投南山陲
當門流水行相隨
烟霧陰冥雪片
片天風突起雲垂垂
吏人散去寂無事
宿鳥羣來若與期
何處洞林好棲息
千峯對望空遐思

病中聞揚州寇報

三朝生長太平時
海上風波世豈知
垂老那堪聞盜起
謀生却恨買山遲
伏波將士今非少
露布東南未

有期徒使江湖懸
夢寐野人愁絕鬢
成絲

移菊

小園初夏菊堪移
引徑沿墻旋作籬
為待繁英供採掇
故應連雨細紛披
開時野老誰同賞
若對南山晚更奇
濁酒預拚重九約
狂風莫損最高枝

丁巳除夕

張燈擊鼓淹除夜
對酒停歌獨愴神
眼見百年真過鳥
能禁白髮又逢春
媚人梅柳仍多態
滿地干戈柰此身
且向尊前拚一醉
忍令江草喚愁新

積雨

春來日日愁陰雨
入夏能禁雨更多
傍檻好花還自發
衝泥騎馬有誰過
休嫌野水當門巷
應為山人長薜蘿
任意浮雲饒變態
滄洲滿眼且狂歌

喜東昌兄辭官歸

十年予已卧松筠
更喜君歸共隱淪
池草夜來能入夢
海雲東望轉傷神
門前便擬開三徑
林下還應見一人
澗水石門亦勝地
種瓜栽柳付閒身

哭廖時芳

廖隴州才士年二十而夭

二十成名入帝州
談詩歌劍迥風流
佇看日近黃金闕
豈料天開白玉樓
關月定懸鸚鵡
夢岐雲無復鳳皇遊
愁來為寄招魂曲
腸斷秦山隴水頭

聞警

太原烽火照中原
何事諸軍守鴈門
終夜聞笳獨洒淚
平生說劍只空言
誰堪清嘯臨邊月
坐遣胡塵淨塞垣
人道漢皇新好武
洗兵今擬到河源

寄王太史元思謫戍玉壘

學士兩朝供奉年
上林詞賦萬人傳
一從玉壘長

為客幾放金雞未擬還聞道買田臨灌口能忘歸馬
向秦川五陵他日多豪俊空望城南尺五天

五言絕句

江干曲

江上與君別日來江上看知隨江水去猶自立江干

山中二首

散髮詠滄浪荷鋤采薇巖松風滿天地歸卧空山月

其二

山下玉泉流山上白雲卧草堂雲水間日對青山坐

山行

偶入萬山中不知山近遠林深不見人雲裡聞雞犬

七言絕句

嘉靖南巡歌三首

羽騎良家十萬隨長安爭觀漢官儀郊南盡是風雲
色城上齊懸日月旗

其二

今日承天是故豐重看父老意無窮行宮為下寬
租詔不數當年歌大風

其三

靈官歸奏 紫宸朝玉簡金幢望不遙却笑周王窮
八駿至今留下白雲謠

上新河

溪上人家十里連門前楊柳繫長船青天白鷺雙雙
起那對春風惜酒錢

黃鶴樓

城上雲飛黃鶴樓城下江傳鸚鵡洲僊人才子今安
在萬古獨看江漢流

御河

御溝春日長春羅楊柳青時鳧雁多銀漢由來通苑
水仙槎誰與問天河

九日雨中菊盛開

蓬門風雨委泥沙叢菊能開九日花若更白衣來送
酒吾廬還擬是陶家

聞南海盜三首

烽火年年朔塞多那堪南海更揚波天風突起鯨鯢
島白日鷺看罔象過

其二

昨聞三省議南征五月兵臨瘴海行莫惜金錢傾少
府直愁開府是書生

其三

九天日月自西清夜夜開壇望斗情拱衛星垣常帝
座掃清炎海仗天兵



